

## Tacheles: 34. Chaos Communication Congress – Mekka fir Hacker



vun Chaos Computer Club Lëtzebuerg den 08/10/2017



Am Dezember ass et erëm esouwäit. De 34ten Chaos Communication Congress fënnt statt. Dëse gëtt vum Chaos Computer Club Däitschland organiséiert an ass net esou wei déi läscht Joren zu Hamburg, mee dës Kéier zu Leipzig. Vum 27 bis 30 Dezember treffen sech méi wei 13000 Mënschen aus der ganzer Welt, dorënner Bastler, Kënschtler, Technikfreaks, Hacker sou wei otto-normal Bierger. D'Ziel ass wei all Joer, dass d'Leit sech austauschen, sech géigesäiteg nolauschten, vunenee leiere souwéi zesumme feieren.

Wat geschitt dann elo konkret op sou engem Congress an wéi leeft dat ganz of?

Vum éischte bis zum läschten Dag ginn et Virtrëg zu deene verschiddensten Themen. Virtrëg sinn a verschidden "Tracks" opgedeelt. Des Joer ginn et 6 verschidde Kategorien:

“Art & Culture”, “Ethics, Society & Politics”, “Hardware & Making”, “Security”, “Science” an “Resilience”. Hei ass also fir jiddwereen eppes dobäi!

Huet ee mol eng Kéier keng Loscht sech ee Virtrag unzelauschteren, kann een sech am Hackcenter oder an engem vun deene ville Community-Assemblies, mat deenen anere Besicher treffen an sech austauschen. Niewent dem offizielle Programm, gött och vill vun de Besicher selwer organiséiert, wéi zum Beispill Workshops, Entwécklertreffen oder Projetgruppen. A wann dat kengem eppes seet, kann een sech einfach iergendzwoch hin setzen an hacken oder ann Lounge goen a Party maachen. De Congress ass nämlech 24 op 24 op.

En Haaptdeel vun der Organisatioun besteet aus Fräiwëllegen, den sougenannten Engel. Et ass en eegent Ökosystem fir Allerlee Aarbechten ze maachen, vun Herold (deen Introduktiounen bei de Virträg meescht) bis zu Barkeeper oder Kameramann. Dat läscht Joer si esou 2576 Leit zesumme komm fir aus dem Congress daat flott Event ze maachen, wéi et méttlerweil bekannt ass. D’Engel liewen natierlech och um Congress wei am Himmel oder besser gesot an engem eegene Raum wou se gratis verpflegt gi. Matmaache ka jiddereen an dem en sech am Engelsystem aschreift, an déi eng oder aner Schicht klickt.

Firwat recommandéiere mir jiddwerengem eng Kéier dohinner ze goen?

Net nëmmen déi eenzegaarteg Stëmmung mee och dee ganze Feeling maachen déi véier Deeg zu engem onvergiesslechen Event. All Joer kennt een sech wei op engem anere Planéit vir, an dem Mënsche ganz oppe mateneen ëmgi genau sou wei jiddwereen dat ka sinn wat e well. Do kann een einfach mol säi Laptop trëlle loossen ouni ze fäerten een geklaut ze kréien. Dat eenzegt wat do guer net gäre gesinn ass, si Kamerae, well een jo leider ni weess, wat mat den Fotoen, déi sou geschoss ginn, geschitt. An nach zu gudder lescht d’Hacker Ethik, déi beseet: “Be nice to each other” – also sidd léif mateneen.

Mee och vir déi Léit, déi net kennen ob de Congress goen, ass geduecht, well Virträg gi live gestreamt an opgeholl. Dëst kann een ënner <https://streaming.media.ccc.de> maachen oder spéiderhi kann een Virträg ob <https://media.ccc.de> nach eng Kéier nokucken.

Wann dir méi wëllt zum Congress gewuer ginn, da späichert iech deen heite Site onbedéngt <https://events.ccc.de/>. Mir als Chaos Computer Club Lëtzebuerg treffen eis all Méinden ab 19 Auer an eisem Veräinslokal, der Chaosstuff, an der Victor Hugo Haal um Lampertsbiere. Fir méi Informatiounen gewuer ze ginn, luesst emol op <https://c3l.lu> laanscht oder besicht eis op enge vun eise Versammlungen. Jiddereen ass wëllkomm!

Image Source: <https://www.flickr.com/photos/fabi11/23801288349/>

*Am Tacheles gi mer Persounen d'Méiglechkeet, sech zu engem Thema fräi ze äusseren. Dobäi gräift d'Redaktioun net inhaltlech an. D'Auteure sinn eleng fir hier Positioune responsabel.*

## **Chaos Computer Club Lëtzebuerg**

De Chaos Computer Club Lëtzebuerg gëtt et säit 2008. E setzt sech fir den Dadeschutz a fir eng transparent Regierung an.

